

Necrolog Helena Monn-Decurtins 1919-2011

Ilis miez mars ei Barla Decurtins-Beer en fossa ed entgins dis pli tard suonda Helena Monn sia quinada. Ella sezza ha giu detg tier la mort da Barla era jeu sun stauncla, era jeu pudess ir ussa. Aschia ha il Segner clamau ella ils 22 da mars en l'aulta vegliadetgna da 91 onn. Ruasseivlamein ha ella astgau sedurmentar ed ir vi ella perpetnadad.



La Leni ei stada ina persuna allerta, plein beinvulientscha ed adina curtesevla. Adina in bien plaid cun tut tgi ch'ella haveva da far ni sentupava. Adina interessada per il cuors da quest mund era ella enconuschenta lunsch entuorn. Pil bia saveva ella tgei che schabegiava da lunsch e da maneivel. Quei entras las medias, mo surtut entras las numerusas visetas da ses numerus enconuschents. Seveser e dar ina paterlada cun parents e buns enconuschents gudeva ella mintgamai tut aparti. Cunzun la viseta ed il quitau di per di da sia cara sora

Rita, appreciava ella zun fetg. Era la preschientscha da sia sora Ursulina ch'era avon entgins onns turnada anavos en la patria e secasada en Tgèsa Sogn Vigeli ha legrau ella. Bials muments ch'ellas treis han saviu guder aschia ensemen.

La Leni ei naschida il fenadur 1919 a Glion. Ses geniturs Hans Giachen e Luisia Decurtins-Agosti eran sesents giu egl emprem marcau sper il Rein. Suenter 5 onns ei la famiglia returnada a Sedrun ed ils geniturs han surpriu il hotel Oberalp. Tuts onns da scola ha ella frequentau en la val. A Will SG ha ella giu la cuida da far igl emprendissadi da frisunza. Alla riva dil lag Lemman a Lausanna ha ella recaltgau ulteriura practica vid siu mistregn. Igl onn 1939, returnada a casa, ha ella aviert in salun da coiffeusa el Hotel Alpsu. Sper quella lavur ha ella gidau ils geniturs el menaschi dil hotel.

Igl onn 1944 eis ella sespusada cun Felici Monn da Camischolas. Demai ch'els han buca giu la cuida da haver atgna famiglia, ha la defuncta adina tgirau in bien contact cun lur nevs e niazas. Biars onns ei la Helena stada

occupada fetg cun sia lavur, gie perfin a Mustèr ha ella giu per in temps in pign salun. Leu era ella sil pli bia in di ad jamna per retscheiver e survir sia fidada clientella. Entgins onns ha ella habitau cun siu consort Felici a Sedrun el vitg. In per onns pli tard han els cumprau atgna casa a Niregl. Per buca esser tut persula eis ella sedecidida da habitar ensemen cun sia sora Rita suenter ch'igl um Felici ei morts igl onn 1992. Biars onns han ellas duas gudiu in bien ambient communabel e quei tochen igl onn 2006. En la vegliadetgna da 86 onns ha ella priu dimora en la Tgèsa sogn

Vigeli. Quei per prender in tec pli lev e guder il bien quita e la tgira che la casa porscha.

Il buca puder pli, esser visada vi sin la supia da rodas ed igl agid dallas tgirunzas ha magari stuncientau ella. Tut ei vegniu pli ruasseivel e quiet. Ella era vegnida stauncla, las forzas e la buna energia ein svanidas di per di. Aschia ei la defuncta seremessa a siu destin. Il mardis, ils 22 da mars avon miezdi en l'aula vegliadetgna da 91 onns ha ella astgau sedurmentar. Cara onda Leni, gauda il ruaus perpe- ten e la beadadad celestiala.